



# PREZIDÉNSIA KONSELLU MINISTRUS

V GOVERNUN KONSTITUSIONÁL

DÍLI, LORON 28 FULAN JANEIRU TINAN 2014

## KOMUNIKADU IMPRENSA

### **Sorumutu Konsellu Ministru loron 28 fulan Janeiru tinan 2014**

Governu hala'o sorumutu iha tersa-feira ne'e, loron 28 fulan Janeiru 2014, iha sala sorumutu Konsellu Ministru nian, iha Palásiu Governu, iha Díli, no aprova ona:

#### **1. Nomeasaun Milena Soares Abrantes ba Prezidénsia Konsellu Administrasaun Rádiu no Televizaun Timor-Leste nian**

Governu nomeia Milena Soares Abrantes nu'udar Prezidente Konsellu Administrasaun Rádiu no Televizaun Timor-Leste nian, Empreza Públika (RTTL, E.P.), ba mandatu tinan haat, tuir lei.

Tuir n.º 2, artigu 8.º husi Estatutu RTTL, E.P. nian, Konsellu Ministru mak iha kompeténsia atu nomeia no ezonera Prezidente Konsellu Administrasaun Rádiu no Televizaun Timor-Leste, (RTTL, E.P.) nian, bazeia ba proposta membru Governu ne'ebé responsável ba área komunikasaun sosiál nian mak, Sekretáriu Estadu Komunikasaun Sosiál.

Nune'e Prezidente Konsellu Administrasaun RTTL, E.P. nian ida uluk, Expedito Ximenes, husik ona ninia kargu tanba nia mandatu hotu ona.

#### **2. Dekretu-Lei ne'ebé aprova Rejime kona-ba Ezekusaun Penál**

Dekretu-Lei ne'e aprova rejime ba ezeekusaun penál, hodi regula ezeekusaun pena prizaun nian no medida seguransa internamentu inimputável iha estabelesimentu ka unidade prizonál sira ne'ebé depende ba Ministériu Justisa. Regula mós ezeekusaun pena prizaun suspensa no pena serbisu ba comunidade, ne'ebé aplika hanesan substituisaun ba ezeekusaun pena prizaun nian.

Rejime Ezekusaun Penál ninia objetivu prinsipál mak harii sistema ida kona-ba administrasaun justisa penál umanu nian ida ne'ebé justu no seguru iha Timor-Leste, ne'ebé orienta ba reinsersaun sosiál dadur sira nian, atu hodi haree ba dignifikasaun ida ne'ebé boot liu ba sira nia kondisaun moris nian iha



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@gmail.com  
(+670) 33 310 608

estabelesimentu prizonál sira. Atu to'o ba objetivu ne'e, maka kria ona medida sira ne'ebé bele kria oportunidade nesesária no adequada ba dezvoltamentu prosesu individuál kona-ba akompañamentu no reinsersaun sosiál dadur sira nian, nune'e mós hodi hadi'a sira nia prezisa loroloron nian, liuliu iha matéria sira hanesan saúde, edukasaun, servisu no seguransa sosiál ka assisténsia relijoza.

### **3. Dekretu-Lei ne'ebé aprova Rekursu Materiál no Insetivu Finanseiru sira Lideransa Komunitária sira nian**

Diploma ida-ne'e revoga Dekretu-Lei n.<sup>u</sup>3/2012, lora 3 fulan julu, ne'ebé define modalidade husi insetivu finanseiru no montante hirak ne'ebé atu fó ba estrutura lideransa komunitáriu sira nian no sira ninia representante sira. Ho nune'e maka halo ona definisaun ho detalle ne'ebé boot liu, kona-ba modalidade benefísiu nian sira, montante hirak ne'ebé atu fó, kompeténsia no responsabilidade Estadu nian sira, liuliu husi Ministériu Administrasaun Estatál no Administrasaun Distritál sira, nu'udar entidade Governu nian ne'ebé iha kompeténsia atu promove no ezejuta polítika sira kona-ba dezvoltamentu lokál.

Atualizasaun ida-ne'e mosu tanba iha nesesidade atu halo adaptasaun ba situasaun sira iha terrenu, nune'e mós ba sasán folin ne'ebé sa'e maka'as iha nivel lokál, hodi halo revizaun ba montante hirak ne'ebé atu fó ba lideransa komunitária sira, tuir modalidade benefísiu nian sira ne'ebé iha.

Konsellu Ministru mós halo análise kona-ba:

#### **1. Relatóriu vizita husi Misaun Apoiu Dahuluk ba Prosesu Eleitorál iha Repúblika Giné-Bisau**

Sekretáriu Estadu Desentralizasaun Administrativa apresenta ona ba Konsellu Ministru, relatóriu kona-ba vizita Misaun Apoiu Dahuluk ba Prosesu Eleitorál iha Repúblika Giné-Bisau. Timor-Leste tulun ho osan ho valór \$6,000,000.00 dólar amerikanu ba Misaun ida-ne'e, ne'ebé hala'o ona knaar iha Giné-Bisau besik fulan haat nia laran, ho objetivu atu ajuda prepara prosesu eleitorál. Servisu delegasaun Timor-Leste nian iha Guiné-Bissau, hala'o iha kolaborasaun ho Gabinete Integradu Nasoins Unidas nian ba Konsolidasaun Pás iha Guiné-Bissau (UNIOGBIS).

Misaun ida ne'ebé sei sai nu'udar Misaun Apoiu Daruak nian tenke dezloka ba Guiné-Bissau, molok eleisaun ne'ebé marka tiha ona ba lora 16 fulan Marsu.

#### **2. Rezolusaun Governu nian n.<sup>u</sup> 35/2011, lora 23 fulan Dezembru**

Konsellu Ministru halo ona análise ba desizaun, ne'ebé aprova tiha ona liuhusi Rezolusaun Governu n.<sup>u</sup> 35/2011, lora 23 fulan Dezembru, ne'ebé, entre kestaun hirak seluk, maka temi kona-ba proibisaun ba explorasaun husi joga bola *guling* no lotaria iha territóriu nasional Timor-Leste nian. Iha sorumutu ohin nian, Governu reforsa tan nesesidade atu bandu nafatin.



Fó hanoin katak fatin hirak, públiku ka privadu, iha ne'ebé sei iha prátika kona-ba atividade hirak ne'ebé temi iha rezolusaun ne'e, sei taka kedas.



Palácio do Governo,  
Avenida Presidente Nicolau Lobato,  
Dili, Timor-Leste

[pcm.gov.tl@gmail.com](mailto:pcm.gov.tl@gmail.com)  
(+670) 33 310 608